

Protocol no. 67
Sezzüda da marcurdi, 05 gün 2013 19.00 – 22.00

Preschaints: Albert Mayer, Andri Poo, Men Caviezel,
Marianne Werro-Lehmann e Marco Fallet (protocol)

S-chüsà, il schef da fabrica, Dumeng Jann.

Protocol

Il protocol no. 66 da la sezzüda da marcurdi, als, 29. Mai 2013 vain approvà.

600 021 FABRICA
Not Vital, Prà Grond, construcziun d'ün atelier

Il termin da publicaziun ais scadü ed uschè conced'ìl Cussagl il permiss da fabrica.

Quista fatschenda d'eir'eir gnüda trattada suot il nr. 565.

601 80 AGRICULTURA
Promoziun da la qualità da la cuntrada

L'Uffizi d'agricultura e da geoinfuormaziun avisa, ch'a partir dal 2014 giaja in vigur la nouva politica agrara da la Confederaziun. Uschè drizz'oura quella (2014-2017) pajamaints directs per prestaziuns dals paurs a favur da la qualità da la cuntrada. I'l chantun Grischun elavura üna grupp incumbensada il proceder per progets da qualità da la cuntrada regionalas. Sco portaders pella realisaziun dal proget figüran las societats agriculas regionalas.

Davart da l'uffizi chantunal d'agricultura vain propuonü als cumüns da's participar in möd activ vi da la fuormaziun e da portar aint lur ideas. Ultra da quai propuona quel als cumüns da sustgniar il proget eir finanziamaing. Ils portaders prevezzan d'inoltrar üna dumonda als cumüns per üna contribuziun unica da sustegn, chi's basa sülla surfatscha agricula utilisabla. Per nos cumün significhess quai üna somma da fr. 3'092.00.

Il Cussagl va in princip d'accord cun quai. El decida però da spettar fin cha la dumonda per üna contribuziun ais avantman. Là trarà lura el sia decisiun supr'ün ev. contribuziun.

602 6 TRAFIC
Proget correctura / refacziun da la via chantunala Sent – Crusch
Trajet Saqlina – Tufera

L'uffizi da construcziun bassa dal Grischun piglia posiziun sün nossa charta dals 30 avrigl 2013, cun quala d'eira gnü giavüscha da construir la via cun üna larghezza da 5.80 m. Il Chantun deplorescha da na pudair aderir a quel giavüscha e quai our da plüs motivs:

- Pro la via tanter Sent e Crusch as tratta quai d'ün'uschè nomnada "seguonda colliaziun" sper quella da Scuol – Sent e tala sta in discussiun per croudar in possess dal cumün i'l stadi existent, quai chi nu füss brichafat na d'avantag pel cumün.
- Ils plans actuals as basan sül proget d'exposiziun, chi'd ais fingià gnü approvà da la Regenza. Latras ais eir gnü fixà ed acquistà il terrain necessari.

- La strivla da terrain reservada nun ais sufficianta pella realisaziun d'una via cun una larghezza da 5.80 m. I stu vess lura gnir elavurà ün novv proget e gnir realisada danouvmaing tuot la procedura d'exposiziun e d'approvaziun. Sper la dumonda da l'acceptanza füss da quintar cun ün lung temp fin pro la realisaziun dal proget.

Il Cussagl piglia cogniziun dal manzunà survart e salüda l'intent dal Chantun da vulair realisar il proget. Las lavuors as splajaran da l'avuost fin october 2013.

603 300.311 Cultura
Proget d'Interegg / via da cuntribanda Uina – Damal – Sesvenna
B32 / ruta da bikes

I sun gnüts fixats seguaints termins pellas prosmas duos sezzüdas:

- 12 gün 2013 a Sent in chasa cumünala Misoch (invid graubünden BIKE)
- 26 gün 2013 a Damal

Davart da nos cumün vegnan destinadas seguaintas persunas:

Pels 12 gün 2013 a Sent sco eir pels 26 gün a Damal

Il Capo, Albert Mayer, il vicecapo, Andri Poo, la cusgliera, Marianne Werro-Lehmann, il silvicultur, Mario Riatsch ed il manader tecnic, Christian Poo.

Ün dals böts importants ais, da cumbinar divers progets, chi sun per part fingià instradats sco:

Senda da cuntribanda Sesvenna – Uina, senda culturala Puntins Ots, senda Sesvenna – Fenga.

604 620.314 Mantegnimaint / vias cumünalas
Proget sanaziun Punt e mür a Sur En

Il büro d'indschegner Könz, Zernez ha elavurà ün proget. I'l fratemp as haja gnü trattativas intensivias culla chüra da monumaints dal Grischun, Sar Johannes Florin. La punt stà suot protecziun e davart da sar Florin sun gnüdas fattas diversas pretaisas. Il proget prevezza la francaziun dal mür cun barbachans. Il mür existent sto restar.

Uossa vain il proget surelavurà seguond directivas da sar Florin, il qual sarà prosmamaing sül lö da fabrica.

A regard stima da cuosts po gnri manzunà, cha tuot tenor la varianta pretaisa da la chüra da monumaints pon quels s'amuntar a raduond fr. 50'000.00.

605 DIVERSAS SCHEFS

Problematica access Palü da Sala – Muglin Vegl

Il vicecapo, Andri Poo, orientescha sur da la visita oculara a Palü da Sala – Muglin Vegl, pro l'access da l'object da duonna Donnerstag. Facit: Ils preschaints s'han convgnits per il piazzamaint d'una s-chala i'l catram. L'offerta demuossa cuosts da raduond fr. 13'000.00. Il Cussagl va in princip d'accord cun quella soluziun. Ant co ch'el tir'una decisiun dessan amo gnir fats alchüns sclerimaints.

Jon Curdin Felix / don rumida da naiv 2012, refacziun dal mür ed ev. barat da terrain

Il don vain refat. L'offerta, cha'l Cussagl ha pretais, prevezza cuosts da raduond fr. 6'600.00. El conced'il credit.

Società d'alps e chascharia Sent / dumonda per pascular muvel ester

Il cusglier dal dicasteri, Men Caviezel, preschainta la dumonda dal president, Ludwig Noggler, chi prevezza l'alpigiada da ca. 80 armaints süts da la Svizra Bassa. Il Cussagl conceda quel permiss cun vusch unanima.

Deposit da veiculs ed utensils a Sot Crusch

Men Caviezel orientescha d'avair trattà culs tangats. Quels sun prunts da pajar üna taxa. Actualmaing sun plazzats là 6 veiculs. Il Cussagl decida da fixar la tax'annuala sün fr. 100.00 pro veicul o utensil.

In quist connex decid'el d'orientar via Mas-chalch, chi saja scumondà da plazzar veiculs ed utensils sül terrain cumünal. Quai vain be plü tolerà in basa d'üna dumonda e d'üna taxa resp. fit.

Eir a garaschists, chi plazzan veiculs a motor, chi nu vegnan plü dovrats resp. tuts in vigur, sün lur areal vain rendü attent, cha quels ston gnir allontanats, in oter cas ston da quels surpassamaints gnir punits.

606

ORIENTAZIUNS

Müdaziun resp. nouv'installaziun da l'indriz d'EED pell'administraziun

La ditte Novicom ha annunzchà las datas per effetuar las lavuors. Uschè vain cumanzà cun quellas in venderdi, als 21 gün 2013 a las 16.00. In lündeschdi, als 24 gün vegnan tuots ils ordinaturs tuts in vigur, uschè cha quel di nun ais quai amo pussibel da lavurar cun quels. In lündeschdi, als 24 gün rest'il büro cumünal serrà.

Zona da quietezza pella sulvaschina Val Gronda

Andri Poo orientescha d'avair trattà la fatschenda cul guardiasulvaschina, Curdin Florineth. Da quella vart vain i d'accord, culla müdaziun dal plan propuonüda davart dal Cussagl. I vain uossa concepi ün nouv plan, chi divergescha be plü in möd minimal a la proposta davart dal cumün da Sent. La fatschenda po uschè gnir preschantada a la radunanza dals 4 lügl. Premissa ais uossa, cha quella vain orientada a tuottas parts tangadas. Il Cussagl decida d'orientar i'l prossem Ma-schalch, chi saja datta la pussibilità da consultar la documainta pro l'administraziun cumünala.

Lukas Bürki, dumonda per campar in Val d'Uina

Il manzunà avda per duos eivnas cun ün chomp da stà da giuventüna e sport in Pradella. Dürant duos dis prevezzan quels da campar illa Val d'Uina. Il Cussagl sto refüsar la dumonda, causa chi regna sün tuot il territori da nos cumün ün scumond general da campar. Quai ais be pussibel süllas plazzas uffizialas. In quist sen vain respus al petent.

Votumaziuns

Il Cussagl piglia cugnuschentscha da la charta d'üna votanta, chi's retira sülla votumaziun dals 3 marz 2013. Ella ha là survgni l'impreschiun, chi nu saja garantida l'anonimità dal votant e votanta.

Il Cussagl decida da dar ün'infuormaziun plü detagliada supr'il vuschar a l'urna e quai i'l prossem Mas-c halch.

Ensemble da teater "Paula fliegt"

Quella gruppa fa minch'on üna turnea grischuna e prevezza quista stà eir üna preschantaziun in nos cumün e quai a Plaz (als 9 lügl 2013) a las 20.00h). Il Cussagl va d'accord cun quai e conced'il credit per üna contribuziun da fr. 500.00.

TESSVM / radunanza generala

La cusgliera dal dicasteri, Marianne Werro, vaiva fat part e dà ün'orientaziun lasupra.

Bieraria Tschlin / radunanza generala

La cusgliera dal dicasteri, Marianne Werro, vaiva fat part e dà ün'orientaziun lasupra. Pustüt sun qua da manzunar las turbulenzas a regard il grond s-chavd dal quint da gestiun 2012 (raduond fr. 190'000.00). La pressa vaiva rapportà in möd detaglià lasupra.

Proget da refaciun da la via chantunala Sent – Crusch / traget Saglina – Tufera

Il Capo, Albert Mayer, orientescha supra la sezzüda chi ha gnü lö ultimamaing culs respunsabels da l'Ütil public, a regard l'allontanamaint da trais bös-chs chi stan a lur da la via. I vain uossa provà da chattar üna soluziun a regard l'indenmnisaziun per quel allontanamaint.

Bar – Cafè “Sala”

Cla Sarott comunichescha, d'avair dat a fit las localitats dal Cafè Sala e quai a partir dals 1. lügl 2013 ad Arno Steiner, Sent. Il Cussagl piglia cugnuschentscha da quai e salüda quel fat. I sto uossa gnir orientà, cha'l nouv fittadin haja d'inoltrar la dumonda per manar l'ustaria ed ev. eir la dumonda pella vendita da bavrondas destiladas, chi sto ir al Chantun.

L'actuar:
Marco Fallet

Il Capo:
Albert Mayer